

《大方廣圓覺修多羅了義經導讀》補充講表

◎附表二十六

○善男子！虛妄浮心，多諸巧見，不能成就圓覺方便。如是分別，非為正問。

◆「浮心」：指緣影妄想；「巧見」：謂巧辯立見。言雖有種種思惟，善巧辯析，立知立見，總非真正方便。欲證圓覺，終不能至。故曰：不能。末二句，正以結斥。意謂汝今欲辯圓覺，連伸三難。如是分別，正類虛妄浮心，多諸巧見。故非正當問也。

◆六塵妄想緣氣，全是虛妄浮心流出。縱多巧見，不能成就圓覺方便。欲成就圓覺方便，唯有「直心」。如《楞嚴經》云：『心言直故，如是乃至終始地位，中間永無諸委曲相』。

◆直心：正念真如。

○金剛藏當知，如來寂滅性，未曾有終始。若以輪迴心……但至輪迴際，不能入佛海。

◆首句謂少文而攝多義，恐其失錯過故。教以當知，令留神也。寂滅性即妙覺性，不可以言說形容，故稱寂滅。求於去來迷悟等相，了不可得，故無始終。由此所以云種種取捨，皆是輪迴。若以二句，頌可訶也。謂既無始終，汝以輪迴心而思惟之，則彼妙性，亦成流轉，故云：即旋復也。既即旋復，詎免輪迴。明其可訶，正為此耳。

◆末二句，正訶其惑。長行乃承上顯況，故云何況輪迴生死垢心，曾未清淨。此中是直言明示，故曰：「但至輪迴際」。正見其垢心未淨也。長行云觀佛圓覺而不旋復，是依況意？顯其不能。此中即直言不能入佛海，意顯果其能入，自不生於三惑。（孤楞楞：孤單也）

◆如來寂滅性二句，最為緊要！故先呼金剛藏之名，而告以當知也。如：不變之體；來：隨緣之用。寂滅性即妙圓覺性。寂滅就真理言，圓覺就真智言。凡夫妄想起滅，若能離念一照。問前念之滅有相乎？有可云終。後念之生有相乎？有可云始。然孤楞楞一個正念，實無終始可言也。今以生滅心說生滅法，皆是輪迴境界，何能悟入如來性海耶？

○譬如銷金鑛，金非銷故有，雖復本來金，終以銷成就；一成真金體，不復重為鑛。

◆首二句全同。次二句補頌。謂恐有問云：金既本有，何用銷為？故云雖本終銷也。喻妙性雖本自有，被無明障，要必斷妄，乃能成就。後二句亦全同長行。

◆偈中不提空華等喻，因只須金礦一喻，便可答盡三難也。雖復本來金終以銷成就二句，是補長行中所未及，甚關緊要！喻凡夫雖有性德，必加修德，方可成就也。

※《大乘起信論》·解釋分云：「問曰：上說法界一相，佛體無二。何故不唯念真如，復假求學諸善之行？」

答曰：譬如大摩尼寶，體性明淨，而有礦穢之垢；若人雖念寶性，不以方便種種磨治，終無得淨。如是眾生真如之法體性空淨，而有無量煩惱染垢；若人雖念真如，不
以方便種種熏修，亦無得淨。以垢無量遍一切法故，故修一切善行以為對治。若
人修行一切善法，自然歸順真如法故。」（方便、修一切善行：修德也）

○生死與涅槃，凡夫及諸佛，同為空華相。

◆長行云：妙心本無菩提涅槃；及無成佛不成等。總以妙性離諸對故。今偈云：同空華相，其意更妙。

◆生死涅槃，皆屬方便之說，對待之相。若有種種取捨，則非正見矣。

○思惟猶幻化，何況詰虛妄？若能了此心，然後求圓覺。

◆長行云：有作思惟，非實心體，已如空華。今云：「幻化」，即空華義也。長行云：用此思惟辯佛境，猶邀空華結空果。今云：何況以此詰圓覺，豈不至虛至妄！有類夫空華空果也。後二句，義頌所問非正。長行云：浮心巧見，不成方便。今云若能撇（撇：拋棄也）了此心，然後可求圓覺。所問非正，不言可知。

◆詰，即三難也。思惟猶如幻化，何況所問之三難，皆屬虛妄耶！